

**Avammut tunioraaneq pillugu Naalakkersuisunut susassaqtunullu sumulluunniit  
attuumassuteqanngitsumik nalilersueqqissaarluni inassuteqaasiortartussamik,  
Avammut Tunioraaneq pillugu Siunnersuisooqatigiinnik kingusinnerpaamik  
UPA2020-imi pilersitseqqullugit Naalakkersuisut peqquneqarnissaannik siunnersuut.  
Ilanngullugu siunnersuutigineqarpoq, avammut tunioraannerup siuarsarneqarneranut  
suliniutit ingerlaavartumik nalilersorneqartarnissaat siunnersuisooqatigiit  
suliassaannut ilaatinneqassasoq.  
(Inatsisartunut ilaasortaq Karl-Kristian Kruse, Siumut)**

## **pillugu**

### **Inuussutissarsiornermut Aatsitassanullu Ataatsimiititaliap**

#### **siunnersuutip aappassaaneernejarneranut**

#### **ISUMALIUTISSIISSUTAA**

Inuussutissarsiornermut Aatsitassanullu Ataatsimiititaliap suliarinninnermini ilaasortarai:  
Inatsisartunut ilaasortaq Múte Bourup Egede, Inuit Ataqtigiit, Siulittaasup tullia  
Inatsisartunut ilaasortaq, Aqqalu Jerimiassen, Atassut  
Inatsisartunut ilaasortaq Hermann Berthelsen, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Randi Vestergaard Evaldsen, Demokraatit  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Tillie Martinussen, Suleqatigiissitsisut

#### **1. Siunnersuutip imarisai**

Avammut tunioraanermut siunnersuisooqatigiinnik pilersitsinissamik Naalakkersuisut siunnersuutikkut peqquneqarput. Avammut tunioraaneq pillugu kaammattuutininik misissueqqissaarnernillu arlaannaannulluunniit attuumassuteqanngitsunik Naalakkersuisunut tamanullu suliaqarnissaq siunnersuisooqatigiit suliassarissavaat. Tassunga ilanngullugu avammut tunioraannerup siuarsarneqarnissaanut iliuitsit pillugit nalilersuinernik siunnersuisooqatigiit ingerlaavartumik suliaqartassapput. Siunnersuisooqatigiinnik pilersitsineq Inatsisartut 2020-mi upernaakkut ataatsimiinneranni pissaaq.

## 2. Naalackersuisut akissuteqaataat.

Inuussutissarsiornikkut avammut niuernikkut suliniutit amerlanersaat, ilaatigut Greenland Businessimi<sup>1</sup>, Greenland Venturemi<sup>2</sup> aamma Visit Greenlandimi<sup>3</sup> aaqqissuussinernik taakkuninnga aqutsisuusuni ingerlaavartumillu nalilersuisartuni, pisortat avataanni inuussutissarsiutitigut siuarsaanissamut ingerlatseqatigiiffinni inissisimasut Naalackersuisut akissuteqaamminni tikkuarpaat.

Kiisalu inuussutissarsiornikkut siuarsaanissaq pillugu Naalackersuisut danskit naalackersuisuinut isumaqatigiissutaat Naalackersuisut erseqqissaatigaat. Isumaqatigiissutip kingunerisaanik inuussutissarsiutinik avammullu tunisinermi ingerlatanut nutaanut 220 mio. kr.-inik immikkoortitsisoqarnera. Aningaasat Greenland Venture aamma Ineriartortitsinermut Aningaasaateqarfimmut (Vækstfonden) akornanni avinneqarput. Isumaqatigiissutip sunniuteqarnissamut piffissaqartinneqarnissaa Naalackersuisunit pingaartinneqarpoq.

Naalackersuisulli nunatsinni inuussutissarsiornikkut avammullu tunisinermik ineriartortitsinissap nukittorsarneqarnissaanik siunertaq isumaqatigaat aammalu naliliippit arlaannaannulluunniit attuumassuteqanngitsumik misissueqqissaarnerit nalilersuinerillu nunani tamalaani niuerfennut nutaanut avammut tuniniaaneq eqqarsaatigalugu atorluarsinnaasutut paasinarsinnaasut.

Inuussutissarsiornikkut siuarsaanarluni iliuitsit ingerlaavartumik nalilersorneqartariaqarnerat Naalackersuisunit aamma taparserneqarpoq aammalu oqaatigineqarluni tapiissuteqartarnermik aaqqissuussinerit assigiinngitsut siunertaq malillugu sunniuteqarnissaat tamanit soqutigineqartoq.

Tamanna tunngavigalugu siunnersuut Naalackersuisunit taparserneqarpoq.

---

<sup>1</sup> Greenland Business aktiaateqarluni ingerlatseqatigiiffiuvoq Kalaallit Nunaanni nunamut tamarmut inuussutissarsiornikkut siunnersuisoqatigiittut atuuffeqarnermik siunertalik, Kalaallit Nunaat nunatut inuussutissarsiortittut aningaasaliiffissatullu saqqumilaalersinniarlugu, kiisalu nunatsinni inuussutissarsiornikkut ingerlatanik aningaasaliisarnemillu siuarsaanermik ineriartortitsinermillu suliaqartussa. Kalaallit Nunaanni inuussutissarsiutinik nunami inissisimasunik siuarsaanissaq immikkut isiginiarlugu inuussutissarsiortunik siunnersuineq aningaasaliisartunik siunnersuineq il.il. ingerlatseqatigiiffiup aamma siunertaraa.

<sup>2</sup> Greenland Venture aktiaateqarluni ingerlatseqatigiiffiuvoq aningaasarsiornermik toqqammaveqarluni suliffeqarfinnut ineriartornissamut periarsissaqarluartunut, periarfissanillu taakkuninnga atorluanaissaq piviusunnortitsinissarluni siunertaralugit aningaasaliiffigineqarnissamik pisariaqartitsisunut aningaasaliissuteqartarnissamik siunnersuinissamillu siunertaqartoq, kiisalu tapiissuteqartarnikkut aaqqissuussat ataasiakkaat siunertaat naapertorlugit tapiissutit atuuttunik aggersunilluunniit ingerlatitseqqinnermik isumaginninnermik.

<sup>3</sup> Visit Greenland aktiaateqarluni ingerlatseqatigiiffiuvoq Kalaallit Nunaanni nunamut tamarmut takornariartitsineq pillugu ilisimasanik katersuinermik kiisalu nunatsinni takornariartitsinermik inuussutissarsiuummik tamatumani sammisassanik ineriartortitsinermik siunertaqartoq.

### 3. Siunnersuutip aningaasaqarnikkut kingunerisassai

Aningaasaqarnermut Siunnersuisoqatigiit ingerlanneqarnerannut aningaasartuutit assigalugit avammut tunioraanermut siunnersuisoqatigiinnik ingerlatsinermik aningaasartuutit ukiumut 1 mio. kr.-it missaaniittussatut siunnersuuteqartumit missingerneqarput.

Naalakkersuisut akissuteqaataat taamatut taggiinermut allannguissamut tunngavissiisinnaasunik paasissutissanik imaqaanngilaq.

### 4. Ataatsimiititaliap isumaliutai

Oqaatigineqareersutut Namminersorlutik Oqartussat inuussutissarsiornikkut avammullu tunisinikkut siuarsaanermi suliniutaannik amerlanerpaanik aqutsineq aktiaateqarluni ingerlatseqatigiiffiit, Namminersorlutik Oqartussanit pigineqartut, arlallit suliassarigaat Naalakkersuisunit akissuteqaammi tikkuarneqarpoq. Tamatumani ilaatigut pineqarput Greenland Business aamma Greenland Venture kiisalu takornialerinerinermik suliaqartoq Visit Greenland.

Aalajangiiffigisassatut siunnersuutip oqaasertalersugaanerata kingunerinngilaa aqutsinerup tamatuma siunnersuisoqatigiinnut nuunneqarnissaa imaluunniit ingerlatseqatigiiffiit pineqartut nunatsinni suliffeqarfinnut siunnersuinerinik siunnersuisoqatigiit tigusinissaat tapertaanissaalluunniit.

Naalakkersuisunut kaammattuutit misissueqqissaarnerillu avammut tunioraanermut siunnersuisoqatigiit sularisassavaat.

Tamanna assersuutigalugu ukiumoortumik nalunaarusiornikkut (Aningaasaqarnermut Siunnersuisoqatigiit assigalugit) aamma/imaluunniit avammut tuniniaanermik suliassa qarfimmi immikkoortut imaluunniit ajornartorsiutit aalajangersimasut pillugit immikkut nalunaarusiornikkut pisinnaavoq.

Imaanngilaq siunnersuinissaq siunnersuisoqatigiit nammineerlutik suliniuteqarnerisigut taamaallaat pissasoq. Taamaalilluni suliassa qarfiit ajornartorsiuteqarfiilluunniit aalajangersimasut pillugit kaammattuutinik misissueqqissaarnernilluunniit, periutsinik iliuitsinillu aalajangersimasunik Naalakkersuisut suliaqarnerminni atugassaannik aammalu assersuutigalugu Inatsisartunut nassuiaasiassat piareersarnerannut ilanngullugu, pissarsinissartik Naalakkersuisut soqutigisinnagaat takorloorneqarsinnaavoq<sup>4</sup>.

<sup>4</sup> Assersuutigalugu aalajangiiffigisassatut siunnersuut, sioqqanik avammut tunisinermi pisussanut pilersaarummik saqqummiussinissamik Naalakkersuisunut pisussaaffiliisoq Inatsisartut ataatsimiinneranni matumani sularineqarpoq. 2013-imi ukiakkut ataatsimiinnermi aalajangiiffigisassatut siunnersuut, Kalaallit nunaanni piniakkanik avammut tunisisinnaanerup siuarsarneqarsinnaaneranut periarfissat pillugit misissueqqissaarnermik suliaqarnissamik Naalakkersuisunut pisussaaffiliisoq sularineqarpoq.

Kiisalu tamanut kaammattuutit misissueqqissaarnernillu avammut tunioraanermi siunnersuisoqatigiit suliaqartassapput. Taamaalillunilu nalunaarusiat misissueqqissaarnerillu siunnersuisoqatigiit nammineerlutik saqqummiussaata tamanit pissarsiarineqarsinnaasunnngortinnissaat tunngavissaatinneqartariaqarpoq.

Kiisalu avammut tunisinermi siuarsaanermut suliniutit pioreersut siunnersuisoqatigiinnit ingerlaavartumik nalilersorneqartassapput. Nalilersuinerit taamaattut suliniuteqarfimmi pineqartumi killissarititaasut aalajangersarneqarsimasunut (aningaasaqarnikkut taamatullu inatsiseqarnikkut allaffissornikkullu) tunngasinnaapput. Kiisalu avammut tunisinermik siuarsaanermut Namminersorlutik Oqartussat aningaasaliissutaat inuiaqatigiinnit pissarsissutigineqartunut ilumut naapertuunnersut aammalu avammut tunisinermik siuarsaanermut allamut atorneqarsimagaluarunik inuiaqatigiinnit annertunerusumik pissarsissutaasimasinnaagaluarnersut siunnersuisoqatigiinnit nalilernerqarsinnaavoq.

Assersuutitut taaneqarsinnaavoq sermimik imermillu avammut tuniniaanermik ukiuni 20-  
ngajanni kingullerni suliniut. Suliniuteqarfiup tamatuma sanarfineranut aqtsivigineqarneranullu Namminersorlutik Oqartussat qanoq amerlatigisunik aningaasaliisimappat? Aammalu inuiaqatigiinnut iluanaarutit qanoq amerlatigisimappat? Aaqqissuussineq allatut ilusilerneqarsimagaluarpat tamanna annertunerusinnaagaluarpa aammalu avammut tuniniaanermi suliassaqarfimmut allamut aningaasaliissutigineqarsimagaluarpata inuiaqatigiinnut annertunerusumik iluanaaruteqaataasimassagaluarpa?

Assersuutigalugu Greenland Businessip aamma Visit Greenlandip siunnersuinerinik Naalakkersuisut ullumikkut aamma pissarsiniarsinnaapput, taamaattorli misissueqqissaarnerunngitsunik (taamaallaalluunniit killilinnik). Taamaattumillu avammut tunioraanermut siunnersuisoqatigiit siunnersuutigineqartut atuuffissaasa aammalu avammut tuniniaanermik siuarsaneq pillugu siunnersorneqarnissamut periarfissaareersut akornanni taputartuuttoqarsinnaasoq oqaatigineqarsinnaavoq.

Ingerlatsisooreersut qanimut suleqatigalugit siunnersuut piviusunnngortinneqassasoq siunnersuuteqartup kaammattuutigigaa aammalu tamanna Naalakkersuisunit taperserseqartoq ataatsimiititaliamit maluginiarneqarpoq. Taamatuttaaq siunnersuisoqatigiit pilersinneqassagunik suliassanik ilisimasaqartunik, nunatsinni inuussutissarsiortut sinniisaannik, aammali siunnersortinit nunanit allaneersunit inuttalernerqarnissaannik siullermeerinninnermi kaammattuuteqartoqartoq ataatsimiititaliamit maluginiarneqarpoq. Kiisalu siunnersuisoqatigiit Namminersorlutik Oqartussat aqtsinerannut aammalu naalakkersuinerinermik suliaqartunut attuumassuteqannginnissaat qulakkeerseqassasoq.

Siunnersuut avammut tunioraanermut tunngasoq ataatsimiititaliap naggasiutigalugu oqaatigissavaa. Takornariaqarnermi ingerlatat avammut tunioraanermut ilaasutut oqaatigineqarsinnaanersut assigiinngitsumik paasineqarsinnaavoq. Ataatsimiititaliamilli maluginiarneqarpoq isumaqarnartoq siunnersuuteqartup (aalajangiiffigisassatut siunnersuummut tunngavilersuutimini) Naalakkersuisullu (akissuteqaamminni) takornariaqarnerup avammut tunioraanermut siunnersuisoqatigiit siunnersuutigineqartut suliaassannut ilaanissaa tunngavissaatikkaat.

## 5. Ataatsimiititaliap inassuteqaatai

Ataatsimiititaliami **amerlanerussuteqartut** tassaasut Siumumit, Inuit Ataqtigiinnit, Atassumit kiisalu Suleqatigiissitsisunit ilaasortaatat **siunnersuutip akuersissutigineqarnissaa inassutigaa**.

Ataatsimiititaliami **ikinnerussuteqartup**, Demokraatinit ilaasortaatitap **siunnersuutip itigartitsissutigineqarnissaa inassutigaa** tamannalu pillugu malittuani allassimaneratut tunngavilersuilluni:

Demokraatinit siunnersuutip itigartitsissutigineqarnissaa inassutigineqarpoq. Sukumiinerusumik misissuereerluta paasinarsereerpoq avammut tunisinermut siunnersuisoqatigeeqarnikkut aaqqissuussinermik nunami maani peqareersugut. Suliassat tamakku suliarineqarlutillu isumagineqareerput. Tassunga tunngatillugu Naalakkersuisut taakkunanga siunnersorneqartareerput. Nunat tamalaat akornanni niuerfiit sorliit soqutiginaateqarnerat pillugu Naalakkersuisut siunnersorneqartarput, taamatullu iliuuseqarnermi niuerfiit sorliit isiginiarneqartariaqarnerat pillugu. Taamaalilluni avammut tuniniaanermi siunnersuisoqatigiinnik pilersitsinissaq kissaatigineqarpat taaguummik allanguinissaq naammassagaluarpoq, imaluunniit allatut eqqarsarnissamik toqqaasoqarsinnaavoq, taamatullu nukissat pigeriikkagut atorlugit.


Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappasaaniigassanngortippaa.



Henrik Fleischer  
Siulittaasoq



Hermann Berthelsen



Múte B. Egede  
Siulittaasup tullia



Aqqalu Jerimiassen



Randi V. Evaldsen



Peter Olsen



Tillie Martinussen